

神異典第一百七十一卷

僧部列傳四十七

唐二十三 道悟

附崇信

按宋高僧傳道悟姓張氏婺州東陽人也受天粹氣爲王子生而神僞長而謹愿年十四金翅始毛麒麟方角啟白尊老將求出家慈愛之旨不見聽許輒損薄常膳日唯一食雖體腹羸餒彌年益堅父母不獲已而許之遂往明州大德剎落年二十五依杭州竹林寺大德具戒以勇猛力扶牢強心於六度門修諸梵行常以爲療膏育者資上妙藥開暗冥者求善知識不假舟楫其濟渡乎遂蹴然振策投徑山國一禪師悟禮足始畢密受宗要於語言處識衣中珠身心豁然真妄皆遣斷諸疑滯無畏自在直見佛性中無縉磷服勤五載隨亦印可俾其法雨潤諸叢林悟蓄力向晦采入深阻實冀一飛摩霄乃轉遁於餘姚大梅山是時大曆十一年也層崖絕壑天籟蕭瑟夏無鄰落七日不食至誠則通物感乃靈猿挺穀糗更饋橡栗異日野夫操斧言伐其楚偶所遭觀駭動悚息馳諭朋曹謂爲神奇曾不旬朔詣者成市憑欹倚峭且構危棟費糧供具環遠方丈猛虎耽耽侶出族遊一來

座側斂折肢體其類馴擾可知也夫語法者無階漸涉功者有淺深木愈鑽而見火鑑勤磨而照瞻理必然矣是以掃塵累遞巖藪服形體遺晝夜精嚴不息趣無上道其有旨哉如是者三四年矣將翔雲表慮羽毛之頽鍛欲歸寶所疑道塗之乖錯故重有諮訪會其真宗建中初詣鍾陵馬大師二年秋謁石頭上士於戲自徑山抵衡嶽凡三遇哲匠矣至此卽造父習御郢人運斤兩虛其心相與昭合白月映太陽齊照洪河注大海一味仲尼謂顏子亞聖然燈與釋迦授記根果成熟名稱普聞如須彌山特立大海繇是近佛恢張勝因凡諸國上緣會則答始卜於盪陽次居於潯口終棲於當陽柴紫山卽五百羅漢翱翔地也檀松翁鬱以含風崖巘巖巖而造天駕激灑之紫霞枕清冷之玉泉鸞鳳不集於蓬藿至人必宅於勢勝誠如是也洪鐘待扣童蒙求我川流星聚虛往實歸或接武於林樾或駢肩於廬舍戶外之履爛其盈矣荊州雄藩也都人士女動億萬計莫不擎跪稽首嚮風作焉崇業上首以狀于連帥而邀之不違願力聿來赴請禱及於虛落錫及於都城白黑爲之步驟幡幢爲之輻輳生難遭想得未曾有彼優波鞠多者夫何足云有天皇寺者據郡之左標異他刹號爲名藍困於人火蕩爲煨燼僧坊主靈鑒族而謀之以爲滿人攸居必能福我夫荷擔大事蔑棄小

瓊乃中宵默往肩輿而至二寺夕有所失朝有所得諱論鋒起達於尊官重於返復畢安其處江陵
尹右僕射裴公縉紳清重擁旄統衆風望眇睠當時準程驅車盛禮問法勤至悟神氣灑落安詳自
處徐以輓語爲之獻酬必中精微洞過肯綮又常秉貞操不修逢迎一無卑貴坐而揖對裴公訝其
峻拔徵其善趣謂抗俗之志當徑挺如是邪悟以爲是法平等不見主客豈效世諦與人居而局狹
邪裴公理冥意會投誠歸命既見仁者我心則降如熱得濯躁憤冰散自是禪宗之盛無如此者元
和丁亥歲有背痛疾命弟子先期告終以夏四月晦奄然入滅春秋六十僧臘三十五以其年八月
五日葬之郡東隅靈龕建塔從僧禮也悟身長七尺神韻孤傑手文魚躍頂骨犀起行在於瓊瑤志
在於華嚴度人說法雄健猛利其一旨云垢淨共住水波同體觸境迷著浩然忘歸三世平等本來
清淨一念不起卽見佛心其悟解超頓爲若此也先是煙燄之末殿宇不立顧繇褐且虧瞻禮密念
結構罔知權輿禪宴之際若值神物自道祠舍濱江水焉凡我羈軫富於松梓悉願傾倒施僧伽藍
命工覘之宛若符契於是斬巨棟幹修楹撐崖挂壑雲屯井構時維秋杪水用都涸徒衆斂手塊然
無謀會一夕雨至萬株並進晨發江湄暮抵寺門剗剗之際動無乏者其餘廊廡牀案靡非幽贊事

鄰語怪闕而不書其感攝靈祇皆此類也比丘慧真文賁等禪子幽閑皆入室得悟之者或繼坐道場或分枝化導時太常協律符載著文頌德焉世號天皇門風也又唐豐州龍潭禪院釋崇信未詳氏族信在俗爲渚宮胡餅師之子弱齡宛異神府寬然昔天皇寺悟禪師隱耀藏光人莫我測信家居寺巷恆日提餅筒饋悟公齋食食畢且留一餅曰吾惠汝以蔭子孫信一日自念曰餅是我持去何以反遺我邪莫別有旨乎遂拱手問焉悟公曰是汝持來復汝何咎信聞似有驚怪因勸出家便求攝受曰爾昔崇福善今信吾言故名之也由是躬於井臼供億服勤乃問悟云未蒙指示心要悟公云時時相示信殮稟期言如遊子之還家若貧人之得寶直從荆渚乃詣豐陽龍潭棲止因李翱尙書激揚時乃出世後德山鑒師出其門宗風大盛矣

希遷

按宋高僧傳希遷姓陳氏端州高安人也母方懷孕不喜葷血及生岐嶷雖在孩提不煩保母旣冠然諾自許未嘗以氣色忤人其鄉洞獠民畏鬼神多淫祀率以牛酒助作聖供遷輒往毀叢祠奪牛而歸歲盈數千鄉老不能禁其理焉聞大鑒禪師南來學心相踵遷乃直往大鑒衍然持其手且戲

之曰苟爲我弟子當肖遷道爾而笑曰諾旣而靈機一發廓若初霽自是上下羅浮往來三峽間開元十六年羅浮受具戒是年歸就山夢與大鑒同乘一龜泳於深池覺而占曰龜是靈智也池是性海也吾與師乘靈智遊性海久矣又何夢耶後聞廬陵清涼山思禪師爲曹溪正宗又攝衣從之當時思公之門學者磨至及遷之來乃曰角雖多一麟足矣天寶初始造衡山南寺寺之東有石狀如臺乃結庵其上登臨絕嶽衆仰之號曰石頭和尚焉初嶽中有固瓚讓三禪師皆曹溪門下僉謂其徒曰彼石頭真師子吼必能使汝眼清涼由是門人歸慕焉或問解脫曰誰能縛汝問淨土曰誰能垢汝其答對簡速皆此類也廣德二年門人請下梁於端自江西主大寂湖南主石頭往來憧憧不見二大士爲無知矣貞元六年庚午歲十二月二十五日順化春秋九十一僧臘六十三門人慧朗振朗波利道悟道銑智舟相與建塔與東嶺塔成三十載國子博士劉軻素明元理欽尙祖風與道銑相遇盛述先師之道軻追仰前烈爲碑紀德長慶中也勅諡無際大師塔曰見相焉

神會

按宋高僧傳神會俗姓石本西域人也祖父徙居因家於岐遂爲鳳翔人矣會至性懸解明智內發

大璞不耀時未知之年三十方入蜀謁無相大師利根頓悟冥契心印無相歎曰吾道今在汝矣爾後德充慧廣蔚爲禪宗其大略寂照滅境超證離卽心是佛不見有身當其凝閉無象則土木其質及夫妙用默濟雲行雨施蚩蚩羣眈陶然知化觀貌遷善聞言革非至於廓蕩昭洗執縛上中下性隨分令入以貞元十年十一月十二日示疾儼然跏趺坐滅春秋七十五法臘三十六沙門那提得師之道傳授將來以十二年二月二十二日門人弟子緇俗遷座於本院之北隅孺慕師德號哭之聲山林爲之變色初會傳法在坤維四達禪徒臻萃於寺時南康王韋公臯最歸心於會及卒哀咽追仰蓋粗入會之門得其禪要爲立碑自撰文并書禪宗榮之

法欽

按宋高僧傳法欽俗姓朱氏吳郡崑山人也門地儒雅祖考皆達元儒而傲睨林薮不仕欽託孕母管氏忽夢蓮華生於庭際因折一房繫於衣裳旣而覺已便惡葷羶及迄誕彌歲在於髻辮則好爲佛事立性溫柔雅好高尚服勤經史便從鄉舉年二十有八俶裝赴京師路由丹徒因遇鶴林素禪師默識元鑒知有異操乃謂之曰觀子神府溫粹幾乎生知若能出家必會如來知見欽聞悟識本

心素乃躬爲剃髮謂門人法鑑曰此子異日大興吾教與人爲師尋登壇納戒鍊行安禪領徑直之一言越周旋之三學自此辭素南征素曰汝乘流而行逢徑卽止後到臨安視東北之高巒乃天目之分徑偶問樵子言是徑山遂謀掛錫於此見苦蓋覆置網屑近而宴居介然而坐時雨雪方霽旁無煙火獵者至將取其物頗甚驚異歎嗟皆焚網折弓而知止殺焉下山募人營小室請居之近山居前臨海令吳貞捨別墅以資之自茲盛化叅學者衆代宗睿武皇帝大曆三年戊申歲二月下詔曰朕聞江左有蘊道禪人德性冰霜淨行林野朕虛心瞻企渴仰懸懸有感必通國亦大慶願和尚遠降中天盡朕歸向不違願力應物見形今遣內侍黃鳳宣旨特到詔迎速副朕心春暄師得安否遣此不多及勅令本州供送凡到州縣開淨院安置官吏不許謁見疲師心力弟子不算多少聽其隨侍帝見鄭重咨問法要供施勤至司徒楊綰薦情道樞行出人表一見欽於衆退而嘆曰此實方外之高士也難得而名焉帝累賜以繒繒陳設禮饌皆拒而不受止布衣蔬食悉令弟子分衛唯用陶器行少欲知足無以儒比帝聞之更加仰重謂南陽忠禪師曰欲錫欽一名手詔賜號國一焉德宗貞元五年遣使齎璽書宣勞并慶賜豐厚欽之在京及回浙令僕公王節制州邑名賢執弟子禮

者相國崔渙裴晉公度第五琦陳少遊等自淮而南婦人禮乞號皆目之爲功德山焉六年州牧王顏請出州治龍興寺淨院安置婉避韓滉之廢毀山房也八年壬申十二月示疾說法而長逝報齡七十九法臘五十德宗賜諡曰大覺所度弟子崇惠禪師次大祿山顏禪師叅學范陽杏山悟禪師次清陽廣敷禪師於時奉葬禮者弟子實相常覺等以全身起塔於龍興淨院初欽在山猛獸驚鳥馴狎有白兔二跪於杖履之間又嘗養一雞不食生類隨之若影不遊他所及其入長安長鳴三日而絕今雞冢在山之椒欽形貌魁岸身裁七尺骨法奇異今塔中塑師之貌凭几猶生焉杭之錢氏爲國當天復壬戌中叛徒許思作亂兵士雜宣城之卒發此塔謂其中有寶貨見二翼上下合藏肉形全在而髮長覆面兵士合翼而去刺史王顏撰碑述德比部郎中崔元翰湖州刺史崔元亮故相李吉甫丘丹各有碑碣焉

道樹

按宋高僧傳道樹姓閩氏唐州人也少以辯智沈靜虛豁耽嗜經籍曾無少懈其爲人也貞固足以幹事隱括足以矯時偶遇僧敦喻遂誓出塵自慨年近不惑求法淹遲禮本部明月山大光院惠文

爲授業登卽剃染二年受具乃觀方向道天台南嶽無所不遊後至壽州三峯結茅而居常有野人服色朴素言談異常於言笑之外化作佛形仙形菩薩羅漢或放神光或呈聲響如是涉一十年學侶覩之不測端緒後皆寂爾樹告衆曰野人作多色伎倆眩惑於人只消老僧不見不聞伊伎倆有窮吾不見不聞無盡所謂作僞心勞而日拙其自知之卷羞懷拙而去追無朕迹矣樹於寶曆初年示疾而終報齡九十二明年正月遷塔焉

慧空 附元觀

按采高僧傳慧空姓崔江陵人也家世儒雅奕葉纓綬父任陝服靈寶縣空丁艱天屬堅請入空門庸報乳哺重恩乃投廻鑾寺恆超下授受經業三載誦通及格蒙度聽習敏利因入嵩少遇寂師禪會豁如開悟乃廻三峯於仙掌間有道流綢繆論道薄暮方散非止一過州帥元公頗知歸向召之多以疾辭或至必登元席代宗皇帝聞其有道下詔俾居京師廣福寺朝廷公卿罔不傾信後終於寺春秋七十八大曆八年癸丑九月四日全身堅固而遷塔焉次南嶽東臺釋元觀姓袁氏長安人也父爲河中掾府母兄爲沙門甚敦道化見觀幼齡聰風慧標秀舉有成人之度因勸其出家乃投

興善寺誦經通利五年得度乃於律部俱舍二本渙然條理後出遊方登諸禪會明悟真性如醒宿醒遂趨衡山於東臺而止其道彌昌冥有所感恆得神人密送供施隨其眾寡不聞有闕忽一日神現形再拜曰我是此山檀越常送薄供者我身是也觀問汝何業所致曰我前身曾稱知識體悟匪全妄受信施坐此爲神偶師居此我曹饋糧粗副私願今二十年已足得遂超度故來訣別也觀化緣斯極囑累禪徒而終春秋七十九太和四年十月二日遷塔焉

崇珪

附全補

按宋高僧傳崇珪姓姜氏邾城人也門傳儒素相綴簪裾自天寶已來安史之亂侵敗王略家族遷蕩父爲商賈趨利遵塗於鞏洛間父亡於逆旅珪慨責曰少遭不造子遺哀癯遂議出家至年十八經業蔚通得度俄有雲水之興遊南嶽棲息數齡起迴樂南徐茅山乃依棲霞寺珪已登徑門道聲洋溢會贊皇李公德裕廉問是邦延諸慈和寺一交雅談如遊形器之外曰吾有幽憂之疾非是居侯藩聚落之人也明歲遂行重抵嵩少居於嶽寺太和戊申歲洛下亢陽唯嶽中雨信相繼或謂爲珪之德動龍神之故也開成元年贊皇公攝冢宰請珪於洛龍興寺化徒兩京緇白往來問道檀施

交駢其所談法宗秀之提唱獲益明心者多矣忽告衆訣別入方丈而滅春秋八十六白侍郎撰塔銘會昌元年辛酉八月十日入塔云次淮南都梁山釋全植姓芮光州人也少稟異操自言學作佛度生去忽投本州榮光禪院大智下求度師頗嚴謹約其誦經受具後至洛陽參問禪法徹了無疑辭師觀方至淮南都梁山建立茅舍太守衛文卿命於州治長壽寺化徒衛侯問將來佛法隆替若何植曰眞實之物無振自古於今往復軌躅有爲之法四相遷流法當墮厄君侯翹足可見預言武宗毀教也植終年九十三門人建塔立碑會昌四年甲子九月七日入浮圖焉

道一

按宋高僧傳道一姓馬氏漢州人也華以喻性不植於高原浪以辯識發明於溟海生而凝重虎視牛行舌過鼻準足文大字根塵雖同於法體相表特異於幻形旣云在凡之境亦應隨機之教年方稚孺厭視塵囂脫落愛取遊步恬曠削髮於資州唐和尚受具於渝州圓律師示威儀之旨曉開制之端浣衣鍛金觀門都錯大龍香象羈絆則難權變無方機緣有待聞衡嶽有讓禪師卽曹溪六祖之前後也於是出岷峨玉壘之深阻詣靈桂貞臺之幽寂一見讓公泯然無際頓門不俟於三請作

者是齊於七人以爲法離文字猶傳蠹露聖無方所亦寄清源遂於臨川棲南康龔公二山所遊無
滯隨攝而化先是此峰岫間魍魎叢居人莫敢近犯之者災釁立生當一宴息於是有神衣紫元冠
致禮言捨此地爲清淨梵場語終不見自爾猛螫毒螫變心馴擾胥貪背憎卽事廉讓郡守河東裴
公家泰正信躬勤諮稟降英明簡貴之重窮知術慧解之能每至海霞斂空山月凝照心與境寂道
隨悟深自明者在乎周物博施者期乎濟衆居無何裴公移典廬江壽春二牧於其進修維勤率化
不墜大曆中聖恩普洽隸名於開元精舍其時連率路公聆風景慕以鍾陵之壤巨鎮奧區政有易
柱之絃人同湊轂禪宗戾止降祥則多順而無違居僅十祀日臨扶桑高山先照雲起膚寸大雨均
霑建中中有詔僧如所隸將歸舊壤元戎鮑公密留不遣至戊辰歲舉措如常而請沐浴訖儼然跏
趺歸寂享年八十僧臘五十先於建昌鄱山名石門環以絕巘呀爲洞壑平坦在中幽偏自久是謀
薪火塵劫之會非議岡阜地靈之吉亞相觀察使隴西李公藩寄嚴厲素所欽承於以率徒依歸緬
懷助理爰用營福道在觀化情存節終輟諸侯之旌旗資釋子之幢蓋其時日變明晦人萃遐邇櫟
覆水而爲陸炬通宵而成晝山門子來財施如積邑里僧供飯香普熏自昔華嚴歸眞於嵩陽善導

瘞塔於秦嶺禮視齋斬人傾國城哀送之盛今則三之初於林中經行座下開示平等垂法不標於四科安恬告盡刻期於二月此明一終之先兆也示疾云逝俾葬遠山凡百攀援願留近郭終遂窮僻式遵理命此又明一晦迹之素誠也將歸靈龕爰泝淺瀨人力未濟舟行爲遲膏雨驟下於遠空窮溪湍變於深涉此又明一通神之應感也惟一知真在空無我於有是二俱離假一爲乘示生死者人能作佛辯邪正者魔亦似聖現身不留於大士負手俄萎於哲人弟子智藏鎬英崇泰等奉其喪紀憲宗追諡曰大寂禪師丹陽公包佶爲碑紀述權德輿爲塔銘今海昏縣影堂存焉

智藏

按宋高僧傳智藏姓廖氏虔化人生有奇表八歲從師道趣高邈隨大寂移居龔公山後謁徑山國一禪師與其談論周旋人皆改觀屬元戎路嗣恭請大寂居府藏乃迴郡得大寂付授納袈裟時亞相李公兼國相齊公映中郎裴公通皆傾心順教元和九年四月八日終春秋八十夏臘五十五卽遷於塔諫議大夫韋綬追問藏言行編入圓經太守李渤請旌表至長慶元年諡大覺禪師云

光瑤 附道堅

按宋高僧傳光瑤姓周氏北京人也幼鍾茶蓼都不勝情誓志出家捨講肆入禪林凡嚮宗師悉從求益末遭會禪師金鉀抉膜明視十方後到沂水蒙山結草成庵怡然宴坐鄙費之人翕然從化時慎邑大夫知重首創禪宮次袁州節使王僚尙書躬請入州行化奏著額號寶真學侶憧憧多霑大利元和二年示滅享年九十二云又唐襄州慈恩寺釋道堅姓王氏丹陽人也初發心於牛頭山慧忠禪祖大曆元年栖隱池州南泉山後詣襄漢泊慈恩寺元和初載相國燕公鎮於漢南深相欽重問道周勤施供繁香遂於鳳林關外造寺請居二年示滅春秋七十三云

靈坦

按宋高僧傳靈坦姓武氏太原文水人也則天太后姪孫父諱宣洛陽縣令母夏侯氏初妊坦也夢神僧授與寶鑑表裏瑩然且曰吾以此寄汝善保護之及誕親無所苦年甫七歲誦習畢通應童子舉十三從宦旋升太子通事舍人如是悅學不休三教之書彌增洞達然而恆嗟朽宅誓入空門已備大乘之資糧終到涅槃之境域於時洛都盛化荷澤寺神會禪師也方遮菅寂之光漸沒秀師之道坦往叅焉會施善誘頓見其心默而許之容其執侍父母不能迴其意飛颺莫繫始末研磨得破

疑滯天寶初載召坦曰吾有一句是祖祖相傳至曹溪曹溪付吾汝諦受之吾當有留難遂辭遊方
焉未幾果勅移會於弋陽坦遂向廬州浮槎寺覽大藏經後聞忠國師自南陽詔入於大曆五年禮
觀之八年欲出關忠奏曰此人是貧道同門俱神會弟子勅賜號曰大悲兼齋墨勅行化至梁園時
相國田公神功供養遷迤適維揚六合方嘆大法陵夷忽聞空中聲云開心地卽見菩薩如文殊像
曰與汝印驗令舉項以掌按之尋觀有四指赤痕其印跡恆現又止潤州江中金山今澤心也其山
北面有一龍穴常吐毒氣如雲有近者多病或斃坦居之毒雲滅迹又於江陰定山結庵俄聞有讚
歎之聲視之則白龜二坦爲受皈戒又見二大白蛇身長數丈亦爲受戒懺悔如是却往吳興林山
造一蘭若有三丈夫衣金紫趨步徐正稱歎道場惟善村落之民多棄畝網元和五年相國李公邕
之理廣陵也以峻法操下剛決少恩一見坦鄭重加禮召居華林寺寺內有大將軍張遼墓寺僧多
爲鬼物惑亂坦居愀然無朕矣又揚州人多患山妖木怪之所焚惑坦皆遏禦焉人爭歸信至十年
忽見二胡人稱自龜茲國來彼無至教遠請和尚敷演十一年五月十三日於荷澤忌齋告衆吾赴
遠請七月示疾九月將滅斯預告也至季秋八日果寂爾而終遷塔於揚州西馴翟坊之南岡越州

掾鄭詹建塔報齡一百八歲僧臘八十四焉坦卽曹溪之孫荷澤之子也

道通

按宋高僧傳道通姓何氏廬江人其爲童也持重寡辭見佛形像必對禮嘆咏不捨因父宦於泉州南安便求捨卵披緇誦經合格敕度之當天寶初載也時道一禪師肇化建陽佛跡巖聚徒通往焉一師於臨川南康龔公山亦影隨而去然誓遊方吳越之間台明山谷靡不登陟迨乎廻錫江西泐潭山門勵心僧務不憚勤苦貞元二年往南嶽見石頭禪師猶采縷加朱藍之色也四年大寂禪師垂欲歸化昌言曰夫玉石潤山秀利益汝道業遇可居之通聞此言且同隱懺殊不詳練其年秋與伏牛山自在禪師同游京洛迴至唐州西有山峯孤林密四絕人煙實有塵外之趣乃問鄉人云此山是紫玉山通方憶大寂之懸記我舍居是峰也乃陟崔嵬見山脊有石方正其色紫玉瑩然嘆曰號紫玉者合其稱也先師之言非虛記也掛錫解囊參學之徒霧集始則誅茅構舍刺史李道古作意爲建禪宮焉元和八年弟子金藏出叅禮百丈山海禪師迴見通通愀然作色曰汝來矣此山有主也曳杖徑去襄州道俗皆迎至七月十五日無疾而終春秋八十三一云故相國于頔最所歸心